

LU VINU

Lu vinu chi stà dintra li vutti,
Pigghia culuri e diventa chiù forti;
Lu vinu è lu spassu di tutti,
Piaci a li scinziati e anchi a li dotti,
Piaci a chiddi longhi, a chiddi curti,
Piaci a li sciancati e anchi a li storti,
Piaci, signuri vi lu dicu a tutti,
Sin'anchi a li nostri nanni chi sù morti!

Lu vinu piaci a tutti quanti,
Conti, Baruna, Principi e Rignianti.
A Emanuele ch'era sua Maestà,
Lu vinu ci piacia, quantità,
Nta la buttigghia e lu bucali
Ci appizzau u stemma riali,
E pi rispettu da Rigina
Unn'affunciava nta la tina.

Tra Binitu e u Principinu,
Si gustaru un gran vintinu,
A tempu di scoddi e babbaluci,
Pi vint'anni sempri "Duci".
Barunati e la Contea
Sciugaru stipi, in Eritrea,
Picchè a ddi tempi a Monarchìa
Stipi e vutti assai nn'avìa.

De Gasperinu, cchiù riliggiusu,
Purtau lu vinu cchiù gustusu,
Arrivatu Di Nicola
S'asciugau a prima tinola.
Inaudi invece, lu bicchiereddu,
Si lu riggia cu vastuneddu.
Mentri Gronchi, ogni matina,
Ddui iritedda di na tina,
Poi chiamava lu Ministru
Picchè un viria cchiù lu rigistru.

Segni cchiù mudiratu,
Finiu nSardegna, stralunatu,
E cu rispettu e mudistia,
Fici largu a ccu vinia.
Arrivatu Saragatti
S'asciugau tutti li vutti,
Longhi, curti, tunni e chiatti,
Li lassau tutti asciutti;
E s'iddu ancora cumannava
Puru a cannedda si sucava!

A lu Liuni nferucitu,
Ci tuccau viviri acitu
E la crinera di bellezza
La nfangau mezzu dda fezza;
Comu fù, comu vosi Diu,
Tagghiau la corda e scumpariu.

Vinu meu quantu si bbonu,
Tu ci reggi anima e tronu.
Lu Parrinu ca cannata,
Vivi supra a Missa cantata;

Metti acqua, lu vattìa,
Lu Saristanu chi talìa.
Vinu bbonu di palatu,
Tu stu munnu l'hai guidatu,
Ma chista gran Democrazia
Stà mpusturannu puru a ttìa.

RUSARIU ALL'ITALIANA

Nto primu misteru mistiriusu si cuntempla
Comu sta Santa Matri Libertassi
Metti sempri mora e tassi
E pi megghiu cunzularini
Aumenta la bombula e lu gassi.

Santa Matri pura e casta
Fai ncariri pani e pasta,
Fallu tu, pi caritati,
C'un si mancia cchiù patati.
Ogni figghiu t'ubbidisci
E semu scurdannu carni e pisci,
La sardina cu l'ammogghiu,
Fai chi tu ti suchi l'ogghiu.

Tu hai la giarra e la cannata
Ogni mumentu na frittata,
La frittata nta paredda,
Mannaci arrè cu scoddri e cardedda.

Amen.

Santu Moru prutitturi,
Tu chi fusti nostru Signuri,
Mannanci oggi, anchi dumani,
Li stessi stigmati a Fanfani.
Cu la bon'arma di La Malfa

Si sucavanu la baffa.
Unu tira, l'altu raffa,
Raffa oggi, raffa dumani,
Libertassi a l'italiani,
Finu a quannu ci arridduci
Comu a Cristu, tutti ncruci.

Amen.

Nto secunnu misteru misteriusu si cuntempla:
Santa Matri, Santu Vitu,
Facci la grazia d'un vistitu
Di la Sicilia a li Alpi,
Sulu u vistitu, senza scarpi.
Li tò figghi cchiù curretti,
Cchiù nun portanu quasetti
E la notti si lamentanu
Pi li linzola e li cuperti.

Santa Matri, San Marzottu,
Facci fari macari un cappottu,
Sia beddu, sia bruttu,
Anchi chi fussi strittu e curtu.
Sta Libirtassi tuttu nn'aìsa:
Magghia, pulloviri, cammisa.
Santa matri pura e granni,
Fai chi calinu li mutanni,
All'angiulidda, alla spurtiva,
Fai ncarìri ancora l'I.V.A.

L'I.V.A. è na timpesta
Chi ciucia e fà fracassu,
Culpisci a chiddu mediu,
Culpisci a chiddu scarsu,

Lu mobili, la rradu,
Lu furnu, lu pastaru,
Culpisci u fallignami
E puru a lu scarparu,
Culpisci lu varveri,
Sin'anchi lu firraru,
È comu n'epidemià
Chi nun c'è cchiù riparu
A tutti veni a scuva
Dunni si v'è v'è,
Cu st'I.V.A. si v'è nculu
A tutta l'umanità.

Amen.

Santu Agnelli patri nostru,
Stu gran beni, mezzu è vostru,
Spirannu sempri, pianu pianu,
Ti lu accalocchi tuttu nzanu.
Prigamu sempri li Santuna,
Chi nun ti vinni i capannuna.

Amen.

Nto terzu misteru mistiriusu si cuntempla:
San Fanfani prutitturi,
Tu chi ci pensi a tutti l'uri,
Facci iri a tutti nuri
Nta la cascia, tisu tisu,
Mustraci lu Santu Paraddisu.
Lu Paradisu prediletto,
Tu nun ni usi sapunettu,
Ti fai u bagnu nta piscina,
Mmezzu la nafta e binzina.

Quantu santi mParadisu,
Cu Angiuliddi prediletti,
Si fannu u bagnu e s'arricrianu,
Tra tabaccu e sigaretti.
Quantu Santi mParaddisu,
Cu Angiuliddi dilicati,
Si pulizzianu cu li pinni,
Lu bracciali di li strati.

Quantu Santi e Angiuluna
Si pulizzianu cu li pinni,
Muntagni, trazzeri e canaluna.
Angiuliddi mParadisu
Chi hannu l'ali longhi e fini,
Si pulizzianu cu li pinni,
Marciapedi e banchini.
Angiuliddi mParadisu
Fannu spissu riuturi
Si pulizzianu cu li pinni,
Acquedotti e fognaturi.
Angiulazza mParadisu
Fannu sempri a scaliari,
Si pulizzianu cu li pinni,
Scoli e casi pupulari.
Quantu Santi mParadisu
Cun ciuciuni, cun suspiru,
Fannu li veci di vampiru
Cu li dintuzzi spurgintelli,
Ci sucanu lu sangu a l'animelli.

Amen.

Patri nostru a San Cossiga
Pi lu stentu e la fatica

Chi fici contru i terroristi,
Li dilinquenti e li teppisti.
Li prudigi triplicati,
Cchiù sequestri e scupittatti.
Ora e sempri binidica
Beatissimu San Cossiga.

Amen.

Nto quartu misteru mistiriusu si cuntempla:
Si lassamu u Paradisu
E trasemu mPurgatoriu,
Si fannu lu bagnu, li cchiù grossi,
Cu li resti du petroliu.
Tra consorzi e cantini,
Tra li tini e quarantinu,
Si fannu u bagnu, s'arricrianu,
Tra lu mustu e puru u vinu.

Ci sunnu certi Angiuluna
Chi stannu auti, piani e piani,
Hannu datu muzzicuna,
Si manciaru l'aeruplani.
C'è cu mancia, c'è cu lanza
Tra iddi fannu a cuntrananza.

Chisti Santi cchiù elevati,
Chi stannu auti, vicinu a Diu,
Si fannu lu bagnu e s'arricrianu,
Sunnu misi a lu taffiu.
Mentri invece nall'Infernu
Ci stannu tutti li minchiuna
Chi si fannu u bagnu asciuttu,
Cu li pica e li zappuna;

Pi un pizzuddu di pani duru,
Panza nnintra e testa a muru.

Amen.

Patri nostru a Libirtassi
Sempri avanti cu sti massi,
La purizza di sta matrici:
Quantu sbannuti, quantu latrici.
Mmezzu li stenti e li cunforti,
Sempri all'erta i beccamorti
Ca carrozza, cu la bara,
Pi li bummi e la lupara.
Mutilata, nsangata,
Sta Libirtassi sia ludata.

E sia ludatu ogni mumentu,
Lu Sinatu e Parlamentu,
Di Fanfani a Di Nicola,
Pi la libera parola.
Chi ci dannu lu nostru pani,
Sempri cchiù tassi all'artigiani,
Chi ci dannu lu nostru vinu,
La pinzioni o cuntadinu.
Chi ci risananu li guai,
Scatti di paga all'opirai
Cun prezzu destinatu
Da Libirtassi e Sindicatu,
D'una cifra rappurtata
A un cirinu e na fumata.
E beata sempri sia
Libirtassi e così sia.

Amen.

Nto quintu misteru mistiriusu si cuntempla:
Santa Matri Libirtassi
Fai chi spogghi ricchi e scarsi,
Cu Andriotti fra li righi
Chi nun guarda grossi e nichi.
Beatissimu San Fanfani,
Sbamba tonachi e suttani.
Binidittu San Malfatti
Mancia libbra e allorda carti.
San Colombo miu tisoru
Tu hai lu coccio e setti d'oru.
Arrivatu a San Binignu
Toccu ferru e scanzu lignu.
Pi stì Santissimi biati,
Mazzetti grossi e scartucciati;
E sia ludatu ogni mumentu
Tirrimotu e allagamentu.

Santa Matri Libirtassi
Picchi' curri a tuttu gassi?
Stai facennu na gran cursa
Cu na machina tutta russa.
Quasi a centru c'è na scaffa,
La lassau forsi La Malfa,
La riparava Di Martinu
Manca asfaltu e braccialinu.
Senza mai tu strisci e sboti,
Cu ti ripara Malagoti?
Senza mai tu strisci e sbandi,
Ti vai a tamponi cu Almiranti?
Santa Matri Libirtassi
Picchi' curri a tuttu gassi?
Chiddu t'infila la biella

Cu pala, picu e manganella,
Bibigas, spiritera,
Furnu grigiu e fascia nera.

Santa Matri Libirtassi
Picchì curri a tuttu gassi?
Nun lu vidi u Radiaturi?
Ci affacciau lu pircùlu
E la machina chidda russa,
Ti va sunannu nculu nculu;
Picchì curri veru forti,
È guidata d'un sciafferri,
Chi havi li manu ancora sterili
E si chiama Berlinguerri.
E arrivatu a lu traguardu
Sonirannu li campani,
Carvunara e Democristiani.
E mentri tuttu curri a gonfi veli
S'abbrazzirannu stritti stritti,
Tra lu diavulu e San Micheli.
Sia lodatu Gesu' Cristu.